

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
GRAD ZAVIDOVIĆI
GRADSKO VIJEĆE



N A C R T

Broj: 01-04-2940/22-AP-12
Datum: 05.04.2023. godine

STATUT GRADA ZAVIDOVIĆI

Zavidovići, april 2023. godine

Na osnovu člana VI (2). Ustava Federacije Bosne i Hercegovine („Službene novine Federacije Bosne i Hercegovine“, broj: 1/94, 13/97, 16/02, 22/02, 22/02, 52/02, 60/02, 18/03, 63/03, 9/04, 20/04, 33/04, 71/05, 72/05 i 88/08), člana 70. i 75. Ustava Zeničko-dobojskog kantona („Službene novine Federacije Bosne i Hercegovine“, broj: 7/96) i („Službene novine Zeničko-dobojskog kantona“, broj: 1/96, 10/00, 8/04 i 10/04), člana 13. Zakona o principima lokalne samouprave u Federaciji Bosne i Hercegovine („Službene novine Federacije Bosne i Hercegovine“, broj: 49/06 i 51/09), člana 7. Zakona o Gradu Zavidovići („Službene novine Federacije Bosne i Hercegovine“, broj: 17/22), člana 10. Privremene Statutarne Odluke Grada Zavidovići („Službeni glasnik Općine Zavidovići“, broj: 4/22) i člana 2. Odluke o pristupanju izradi Statuta Grada Zavidovići („Službeni glasnik Grada Zavidovići“, broj: 1/22), na prijedlog Komisije za Statut i propise, Gradsko vijeće Zavidovići, na 12. sjednici, održanoj 05.04.2023. godine, donijelo je

STATUT GRADA ZAVIDOVIĆI

I - OPĆE ODREDBE

Član 1. (Predmet)

Ovim Statutom uređuje se samoupravni djelokrug Grada Zavidovići (u daljem tekstu: Grad) kao jedinice lokalne samouprave, organi, međusobni odnosi organa, mjesna samouprava, neposredno učestvovanje građana u odlučivanju, finansiranje i imovina, propisi i drugi akti, javnost rada, saradnja jedinica lokalne samouprave, odnosi i saradnja sa federalnim i kantonalnim vlastima, kao i druga pitanja od značaja za organizaciju i rad Grada.

Član 2. (Pravni status Grada)

- (1) Grad je jedinica lokalne samouprave sa pravima i obavezama utvrđenim Ustavom i Zakonom.
- (2) Grad je pravno lice.
- (3) Grad je pravni sljednik Općine Zavidovići i ima zakonom određene nadležnosti Grada i preuzima nadležnost, prava, obaveze i imovinu Općine čiji je pravni sljednik.

Član 3. (Temeljna prava i slobode Grada)

- (1) U obavljanju poslova iz svoje nadležnosti Grad će poštovati temeljna prava i slobode građana i konstitutivnih naroda: Bošnjaka, Hrvata i Srba zajedno sa ostalim, te će osigurati u najvećoj mogućoj mjeri njihovu zastupljenost u skladu sa članom IX 11. a. Ustava Federacije Bosne i Hercegovine.
- (2) Grad će osigurati jednaka prava i zalagati se za jednake životne uslove svih svojih građana, uvažavajući nacionalni, vjerski, kulturni i spolni identitet.

II - STATUSNA OBILJEŽJA GRADA

Član 4. (Naziv i sjedište Grada)

- (1) Naziv Grada je: Grad Zavidovići.
- (2) Sjedište Grada je: Zavidovići, Ulica „Mehmed-paše Sokolovića“ broj 9, 72220 Zavidovići.